

- मुख्यमंत्री भजन लाल शर्मा कह्यो— राज्य सरकार पूरी लगन ऊं काम करता थकां एक साल उत्कृष्टता सागे पूरो कीनो— शाहपुरा मांय विकास रा पूरा व्ह्या काम जनता ने सूप्या।
- राज्य मानवाधिकार आयोग चिकित्सा अर जन स्वास्थ्य सेवा निदेशक ने राज्य रा सगळा ब्लड बैंकां री जाणकारी देवण रा हुकम दीना।
- प्रदेश मांय काल सुशासन सप्ताह सुरू कर्यो जावेला।
- राज्य मांय केई ठौड़ां ज़ोरदार ठारी—आज ऊगणी जिलां मांय कोहरा रो असर।

000

मुख्यमंत्री भजनलाल शर्मा कह्यो है के राज्य सरकार एक साल पूरी लगन अर समर्पण सागे काम कीनो है। श्री शर्मा आज भीलवाड़ा कने शाहपुरा मांय राखी ज्यी जनसभा मांय बोल रह्या हा। वे कह्यो के राज्य सरकार कानी ऊं बजट मायं करी ज्या ऐलाण न केवल 5 साल मांय प्रदेश रा विकास ने आगे ले जावण रो रोडमैप है, बल्कि इण मांय विकसित भारत रो संकल्प सांचो करण री सोच ई है। मुख्यमंत्री कह्यो के राज्य सरकार शाहपुरा जिला रा विकास सारु केई ऐलाण कीना है अर करीब 194 करोड़ रुपया रा खर्च ऊं सड़कां बणावण, वां ने सुधारण अर चौड़ी करण रा काम कर्या जा रह्या है। वे कह्यो के वां रा राज मांय 45 हजार ऊं बत्ता नौजवानां ने नौकरी दीरीजी है जद के 85 हजार युवावां ने नौकरियां देवण सारु नुवी भर्तियां निकाली है।

-----

मुख्यमंत्री कह्यो के वां रो राज आतां ई किसानां सारु साखां रो सरकारी मोल सवा सौ रुपया बधायी ज्यो, ज्यीं पाछे देश भर मांय गेहूं रो सब ऊं बत्तो सरकारी मोल राजस्थान मांय दियो जा रह्यो है।

मुख्यमंत्री महाराणा प्रताप अर डॉ. श्यामा प्रसाद मुखर्जी री मूरत रो अनावरण कीनो। ई मौके वे कह्यो के महाराणा प्रताप हिम्मत, अर खुद माथे नाज करण रा प्रतीक है। वे कह्यो के डॉ. श्यामा प्रसाद मुखर्जी महान विचारक अर शिक्षाविद् व्हेवण सागे कुशल संगठनकर्ता हा। मुख्यमंत्री कह्यो के आं विभूतियां री मूर्तियां रा अनावरण ऊं जनता मांय देशभक्ति री भावना बधेला। वे शहीद केसरी सिंह बारहठ, जोरावर सिंह बारहठ अर प्रताप सिंह बारहठ री मूर्तियां माथे ई सिरधा रा फूल चढाया। कार्यक्रम मांय कानून मंत्री जोगाराम पटेल अर जिला री प्रभारी मंत्री मंजू बाघमार समेत जनता रा केई नुमाइन्दा अर अहलकार मौजूद रह्या। मुख्यमंत्री कन्या महाविद्यालय रा नुवा भवन रो उद्घाटन ई कीनो।

000

मुख्यमंत्री भजन लाल शर्मा पंचायती राज राज्यमंत्री ओटाराम देवासी री मां रे देवलोक व्ह्यां पाछे आज पाली रा मुण्डारा मांय राखी ज्यी शोक सभा मांय सिरकत कीनी। वे देवासी रा रहवास माथे जा र वां ने ढाढस बंधायो। मुख्यमंत्री भीलवाड़ा जिला रा सहाड़ा मांय विधायक लादूलाल पितलिया री माताजी रे देवलोक व्हेवण रे कारण राखी ज्यी शोक सभा मांय ई सिरकत कीनी। वे देवलोक व्ही आत्मा री शांति री प्रार्थना कीनी। भाजपा रा संगठन मंत्री चन्द्रशेखर शर्मा री माता जी री श्रद्धांजलि सभा अजमेर जिला रा पुष्कर मांय राखी ज्यी। मुख्यमंत्री सभा मांय दिवंगत आत्मा ने श्रद्धांजलि

दीनी। ई मौके पैली वाली मुख्यमंत्री वसुंधरा राजे अर उपमुख्यमंत्री दिया कुमारी ई मौजूद हा।

000

राज्य मानवाधिकार आयोग चिकित्सा अर जनस्वास्थ्य सेवा निदेशक ने प्रदेश रा सगळा जिलां मांय लाईसेंसशुदा ब्लड बैंकां ऊं जुड़ी जाणकारी मांगी है। आयोग रा अध्यक्ष न्यायमूर्ति जी.आर. मूलचंदानी एक हुकम जारी कर र ब्लड बैंकां रा खून भेलो करण रा बूता, लाईसेंस प्रक्रिया अर वां ऊं जुड़्या दिशा-निर्देशां समेत न्यारा-न्यारा मुद्दां माथे जाणकारी देवण बाबत कह्यो है। मामला री आगली सुणवाई 30 जनवरी 2025 ने करी जावेला।

000

उपमुख्यमंत्री दिया कुमारी प्रदेश रा बुनियादी ढांचा ने और बेहतर बणावण रा काम मांय शोध करण वाळां, इंजीनियरां अर मजूरों रा योगदान री सराहवणा कीनी है। वे आज जयपुर मांय राख्यी ज्या वैश्विक सड़क निर्माण अर सुरक्षा सम्मेलन-2024 रा उद्घाटन जळसा मांय बोल रही ही। वे कह्यो के सरकार प्रदेश रा बुनियादी ढांचा ने मजबूत बणावण सागे जनता ने बेहतर सुबीता मुहैया करावणो तैय कीनो है।

000

राज्य मांय सुशासन सप्ताह रा तैत काल 'प्रशासन गांवों की ओर अभियान 2024' सुरु कर्यो जावेला। 24 दिसंबर ताई चालण वाळा ई अभियान रा तैत पंचायत समिति मुख्यालयां माथे शिविर लगाया जावेला। आं शिविरां मांय जनता री शिकायतां रो तुरत कनपटारो करण रा जतन कर्या जावेला। अभियान रे दौरान सगळा उपखंड अहलकारां ने नोडल अधिकारी बणायी ज्या है।

000

देश मांय साल 2024-25 रा मौजूदा चीनी मौसम रे दौरान गन्ना री 11 हजार एक सौ 41 करोड़ रुपया री बाकियात मांय ऊं किसानां ने आठ हजार एक सौ 26 करोड़ रुपया रो चुकारो कर दियो ज्यो है। उपभोक्ता मामलात अर खाद्य अर सार्वजनिक वितरण मंत्री प्रल्हाद जोशी आज लोकसभा मांय आ जाणकारी दीनी। वे बतायो के साल 2022-23 रा चीनी मौसम मांय किसानां रा गन्ना री बाकियात रो 99 दशमलव 9 फीसदी रो चुकारो ई कर दियो ज्यो है। दूजी कानी केंद्रीय गृह राज्य मंत्री नित्यानंद राय आज राज्यसभा मांय बतायो के पुलिस ने और बेहतर बणावण सारू राज्यां अर केन्द्र रा राज वाळा प्रदेशां ने मदद देवण री योजना र तैत 48 अरब 46 करोड़ रुपया मंजूर करी ज्या है।

000

बीकानेर री महाजन फील्ड फायरिंग रेंज मांय आज सिखावण रे दौरान टैंक मांय गोला-बारूद भरण री बगत चार्जर मांय धमाको व्हे जावण ऊं फौज रा दो जवानां री मौत व्हे गयी अर एक जवान जख्मी व्हे गयो। रक्षा प्रवक्ता लेफ्टिनेंट कर्नल अमिताभ शर्मा बतायो के जख्मी जवान ने हेलीकॉप्टर ऊं चंडीगढ़ ले जायी ज्यो है। देश सारू जान कुर्बान कर देवण वाळा जितेंद्र दौसा जिला रा रहवासी हा जद के दूजा जवान आशुतोष मिश्रा उत्तर प्रदेश रा देवरिया रा रहवासी हा। महाजन फील्ड फायरिंग रेंज मांय चार दिन मांय ओ दूजो हादसो व्ह्यो है। दीतवार ने ई गनर चंद्रप्रकाश पटेल री ड्यूटी रे दौरान मौत व्हे गयी ही।

000

बांसवाड़ा मांय महिलावां अर बच्चां री हिफाजत सारू आज पुलिस री कालिका पेट्रोलिंग यूनिट काम सुरू कर दीनो। पुलिस महानिरीक्षक एस. परिमला बतायो के चौबीस ई घंटा निगराणी करण वाळी आ यूनिट शहर रा न्यारा-न्यारा हलकां ऊं राज सिटीजन कॉर्प एप्प माथे शिकायत मिलण री कुछ ई देर मांय मदद सारू पूग जावेला।

000

सीमा सुरक्षा बल-बी.एस.एफ. री 53वीं राष्ट्रीय सीमांत निशानेबाजी होड़ आज जैसलमेर मांय सुरू व्ही। किशनगढ़ फील्ड फायरिंग रेंज मांय 21 दिसंबर तांई व्हेवण वाळी ई होड़ मांय देश भर रा 700 ऊं बत्ता निशानेबाज अर 11 सीमांत मुख्यालय री टीमां सिरकत कर रही है।

000

प्रदेश मांय पड़ रही तेज ठारी बीचे केई ठौड़ां कोहरो व्हेवण ऊं जिन्दगी माथे असर पड़ रह्यो है। राज्य रा ऊगणी हलकां मांय आज संवारे कोहरा रे कारण आवण-जावण माथे असर पड़्यो। भरतपुर मांय हाई-वे माथे आज आज संवारे यातायात मंथर गति ऊं चाल्यो। ई बीचे सीकर जिला रा फतेहपुर मांय बीती रात पारो ओजू शून्य ऊं नीचे उतर ग्यो।

हनुमानगढ़ जिला रा संगरिया मांय ई आज ठण्ड रो ज़ोर रह्यो। वठे न्यूनतम तापमान एक दशमलव 3 डिग्री सेल्सियस दर्ज करी ज्यो। चूरू मांय 1 दशमलव 8, टोंक मांय 1 दशमलव 9, सीकर मांय 2 दशमलव 8, करौली मांय 3 दशमलव 4, माउंट आबू मांय 3 दशमलव 8, पिलानी मांय 4 दशमलव 1 अर बीकानेर मांय 5 डिग्री सेल्सियस न्यूनतम तापमान नापी ज्यो। ई बीचे मौसम विभाग काल सीकर अर चूरू मांय घणी ज़ोरदार ठारी पड़बा सारू चेतायो है।

महकमो आवता 4 दिन शीतलहर चालण रा आसार जताया है जद के शुकवार ऊं बारां, बूंदी, दौसा, धौलपुर, करौली, कोटा अर सवाईमाधोपुर मांय घणी धुंअर रेहवण री संभावना है।

000

भ्रष्टाचार निरोधक ब्यूरो डूंगरपुर मांय पीएचईडी रा एस.ई. अनिल कछवाहा रा कोटा मांय रहवास री तलाशी लीनी। ई दौरान 9 लाख 22 हजार रुपया री नकदी बरामद करी ज्यी। कछवाहा ने काल एक जणा ऊं दो लाख रुपया घूस रा तौर ऊं लेता पकड़ी ज्यो हो। आज वां रा ठिकाणां री तलाशी रे दौरान एक करोड़ 87 लाख रुपया ऊं बत्ती रकम री एफ.डी.आर अर बचत पत्र, एक करोड़ 16 लाख रुपया मोल रा दो प्लॉट रा कागजात समेत 4 करोड़ 16 लाख रुपया ऊं बत्ता मोल री सम्पत्ति रा कागजात मिल्या है।

000